

Provinsol Eleksen 2021 blong mi

Long evri wik



Introdaksen (Fes toktok).

Welkam long "Provinsol eleksen blong mi, long evri wik". Long buk ia, bae yu faenem impoten infomesen long saed blong eleksen long Penama, Malampa, Shefa mo Tafea.

Long 12 Mei 2021, bae yumi elektem wan niufala provinsol Kaonsel we bae i representem yu long provins blong yu, long neks fo ia. (4 ia)

Buk ia Elektorol Komisen i mekem wetem Vanuatu Elektorol Ofis. Insaed i gat fulap impoten infomesen. Yu mas ridim blong mekem sua se yu redi taem eleksen i kam.

Ol man we oli rejista oli mas ridim buk ia blong oli save gud ol raet mo responsibiliti blong olgeta. Ol kandidet tu oli mas ridim from i gat fulap infomesen blong saed blong olgeta.

Tingbaot, yu mas rejista (putum nem blong yu insaed blong pepa blong vot) mo no fogetem se Nasonol ID blong yu hemi alowem yu blong yu save vot. Be yu mas rejista blong mekem se nem blong yu i stap insaed long elektorol rol.

Spos yu save wan man ino save rid o hemi blaen, plis ridim infomesen ia long olgeta. Spos yu save wan man hemi handikap o ino save muvmuv, plis helpem olgeta long dei blong eleksen. Hemi raet blong evri man mo woman blong hemi rejista long impoten eleksen ia.

Yumi wantem talem tankiu long ol jif, ol jioj, ol NGO's, ol asosiesen mo ol voluntia we oli sapotem dimokrasi long Vanuatu blong helpem se ol man oli save mekem buk ia mo pasem raon long Vanuatu blong mekem sua se ol man oli save ridim buk ia long ol jioj, nakamal mo ol narafala ples.

Spos i gat wan samting insaed long buk ia we ino klia long yu, yu kontaktem Vanuatu Elektorol Ofis (VEO).

Yumi mas wok tugeta blong mekem sua se eleksen hemi kam gud mo i stap long wan pisful spirit. Hemi lo blong Vanuatu Gavman blong givim moa impotens mo moa responsibiliti i go long Lokol Gavman. Ol Provinsol kaonsel oli stap kam antap naoia mo Gavman i wantem givim mo independens long ol provins long saed blong wok blong olgeta. Taswe hemi impoten se ol man bae oli vot long Penama, Malampa, Shefa mo Tafea, oli vot long eleksen long 12 Mei 2021.

VOT BLONG YU

FIUTJA BLONG YU

VANUATU BLONG YU

Yumi glad long Demokrasi blong Vanuatu!

Jeman blong Vanuatu Elektorol Ofis

Wik 1:

14 – 21 Maj 2021



Provinsol Eleksen 2021 blong Penama, Malampa, Shefa mo Tafea.

**Hariap mo ko putum nem
blong yu blong yu save vot!
I gat tu(2) wik nomo i stap.**



Hemia wan mesej i kam long Vanuatu Elektorol Ofis (VEO)

Ia we yumi stap long hem naoia hemi wan impoten wan long saed blong fo provins blong Vanuatu. Ol provins ia, Penama, Malampa, Shefa mo Tafea bae oli gat Provinsol Eleksen long namba 12 long Mei 2021 blong oli elektem ol niu memba blong Provinsol kaonsel. Hemi impoten tumas blong jekem se nem blong yu i stap insaed blong elektorol rol blong mekem sua se bae yu save vot long taem blong eleksen. Spos yu gat 18 ia o antap mo yu no putum nem blong yu long elektorol rol, hemi impoten se yu mas mekem kwik taem nomo. Spos yu lusum elektorol kad blong yu, bae oli no replesem (oli no givim wan narawan). Be spos yu gat nasonol ID kad blong yu, bae yu save yusum hemia blong vot, be mekem sua se nem blong yu i stap insaed blong elektorol rol.

Yu mas rejista (putum nem blong yu insaed long elektorol rol) bifo 31 Maj 2021. Spos yu go afta deit ia, bae i let tumas (ofis bae i nomo save akseptem nem blong yu) mo bae yu no save vot long Provinsol Eleksen.

Elektorol Ofis mo Sivil Status Ofis (ofis blong ol man i bon mo i tet) oli wok togeta mo i gat ol tim oli go long ol provins blong givim ol ID kad, ol Nasonol Aidentiti Kad (ID). Spos yu gat kad ia, bae yu save mekem fulap samting mo bae yu save vot. No mata yu gat wan Nasonol ID kad, bae yu mas rejista spos yu wantem vot long ofis blong vot long ples blong yu. Spos yu rejista bifo long Nasonol Jenerol Eleksen long las ia mo spos yu save wea elektorol ofis blong yu i stap, bae yu no gat nid blong rejista bakegen.

Spos yu gat 18 yia o antap o spos bae yu kasem 18 long 12 Mei 2021 mo yu no rejista yet, hemi impoten tumas se yu go rejista naoia. Mekem sua se yu jekem ol nem blong yu wetem rejistresen ofisa long ples blong yu, o eria administreta (man we hemi bos long ples blong yu) long kaonsil blong yu. Yu save jekem tu ol list we oli putum long provinsol ofis taem yumi kam klosap long eleksen.

Mekem sua se yu rejista

Spos yu muv long wan narafala ples pitim tri manis o spos yu maret mo jenjem nem blong yu afta ol elekseen last taem, bae yu mas go putum ol niufala nem o niufala adres ia wetem ol man blong rejistri. Maet bae oli putum yu long wan narafala poling stesen. Mekem sua se yu save long wea ples bae yu vot.

Taem yu go blong rejistarem nem blong yu, bae yu mas raet insaed long wan pepa (fom). Spos yu no save raet, yu no wori. Wan man long rejistri ofis bae hemi save helpem yu.



Hemia nem blong ol pepa bae yu mas karem wetem yu:

1. Bet Setifikat (pepa we i talem taem yu bon) (spos yu no gat wan, bae yu mas go askem long Sivil Rejistri Ofis fastaem)
2. Tu (2) witnis olsem ol neiba blong yu we oli liv long sem eria olsem yu we olgeta tu oli gat bet setifiket.

Mekem sua yu gat ol pepa

Helpem ol man blong rejista

Vanuatu Elektorol Ofis i askem ol man blong mekem sua se ol handikap man bae oli save rejista nem blong olgeta long rejistri ofis mo blong oli save karem ol ID blong olgeta. Bae oli mas save tu se wea ples nao bae oli vot. Spos yu save wan handikap man, plis yu helpem hem. Evriman i gat raet blong vot. Ol man we oli no save rid tu, oli gat raet blong vot. Plis yu talem long evriman we i no save rid se oli mas rejista mo mas go karem ol ID blong olgeta. Ino gat nid blong save rid mo raet blong vot!

Spos yu save wan man long sem eria we i gat rejistri ofis olsem yu – wan famle blong yu o wan neibo – we hemi tet las ia, plis yu go talem long Elektorol Ofis mo talem long rejistri ofisa. Plis yu mas karem wan pepa o wan samting we i sowem se man ia i tru se hemi tet finis. Yumi nid blong wok togeta blong mekem sua se ol nem insaed blong rejistri oli stret nomo.



Wanem ia Elektorol Komisen?

Elektorol Komisen blong Vanuatu hemi bigfala ofis blong eleksen long kaontri we hemi lukluk long ol samting blong eleksen. Hemi responsibol long rejistresen (putum ol nem insaed blong buk) blong ol man mo talem wea ples nao ol man bae oli vot, mekem sua se rejistri buk hemi stret nomo mo supevaesem ol eleksen. Rejistri buk i gat ol nem blong ol man we oli save vot long kaontri. Komisen hemi supevaes (lukluk) ol eleksen, nem blong kandidet mo spos hemi gat raet blong putum nem blong hem mo talemaot risalt blong eleksen.

Trifala memba blong Elektorol Komisen oli:

Mr Edward Kaltamat hemi Jeman blong Elektorol Komisen.

Ol tufala nara memba blong (Elektorol Komisen) hemi Moli Tarianga mo Pastor Shem Tema.

Oli mekem sua se wok blong eleksen oli folem stret ol lo blong Vanuatu.

Wanem ia Vanuatu Elektorol Ofis?

Vanuatu Elektorol Ofis (VEO) hemi responsibol blong wok long saed blong eleksen. Hemi lukluk long budget (mane) mo hemi responsibol blong mekem sua se elektorol rol (buk wetem ol nem) hemi stret oltaem mo mekem sua se ol man bae oli vot long stret ples blong olegeta.

Bos blong Vanuatu Elektorol Ofis (VEO) hemi Mr. Joe Johnson IATI. (PEO) Prinsipol Elektorol Ofisa hemi bos antap long ol nara ofisa. I gat ol narafala man oli wok wetem PEO blong helpem hem blong mekem ol eleksen oli redi.

PEO hemi ofisol man (man we i gat raet blong toktok) spos yu wantem karem ol infomesen long saed blong eleksen. Spos yu no sua long wan samting, yu save **kol PEO long 23914**. Jekem saet blong internet long elektorol ofis. Bae hemi save givim fulap infomesen long yu long saed blong eleksen. Websaet blong hem hemi www.electoral.gov.vu mo yu save jekem Facebook mo go long saet blong Elektorol Ofis long www.facebook.com/vanuatuelectoraloffice

Yu no lesen tumas long ol famle mo ol fren be yu mas jekem yu wan Facebook mo websaet blong Ekeltorol Ofis blong mekem sua se yu karem stret infomesen.



Wanem ia Provinsol Kaonsel?

Provinsol kaonsel hemi olsem lokol gavman we hemi lukaotem ol man long provins. Ol Provinsol kaonsel oli gat raet blong mekem desisen long saed blong ol man, speseli long saed blong edukasen, dvelopmen mo planing. Konstitusen blong Vanuatu we hemi bigfala lo blong Vanuatu i talemaot se hemi impoten blong "givim raet long ol man blong mekem desisen wetem Lokol Govman blong olgeta"

Hemia i minin se eni kaen man i save kam memba blong Provinsol Kaonsel spos ol man oli elektem olgeta. Ol kastom Jif tu oli save kam memba mo ol man we oli stanap long ples blong olgeta. Ol man we oli nogat eni posisen long vilij blong olgeta tu oli save kam gudfala Kaonsela from oli save gud ol nid blong ol man ples. Ol Kaonsela ia oli stap anda long pawa blong Dipatment blong Lokol Autoriti (DLA) insaed blong Ministri blong Internal Affairs long Port-Vila.

Ol Provinsol Kaonsel insaed long six provins ia oli gat wan stamba ofis mo staf (ol man we oli wok insaed), mo tu oli gat wan man we hemi bos long ol eria mo man ia hemi ripot i go long Sekreteri Jenerol blong Provinsol Kaonsel.

Ol Kaonsela oli wok long fo ia. I gat 99 kaonsela long kaontri. Namba blong ol kaonsela insaed blong Provinsol Kaonsel hemi save jenj wanwan taem. Hemi dipen long namba blong ol man insaed blong Provins. I gat abaot wan kaonsela blong lukaotem 1500 man.

Olsem wanem ol Provinsol Kaonsel oli wok?

Ol Provinsol Kaonsel oli mekem ol komiti blong olgeta mo oli wok long faenens, edukesen mo planing. Komiti blong wanwan provins bae i lukluk long hem mo bae hemi mekem rikomendesen (talemaot tingting blong hem) long Provinsol Kaonsel. Provinsol kansil bae i tekem desisen blong hem long saed ia.

Fulap memba blong kaonsel oli ilekted (ol man we oli givim raet blong olgeta blong stap insaed blong kaonsel), Minista blong Internal Affairs hemi save apointem (putum insaed) ol man long saed blong woman, yut, jif mo ol jioj.



Wanem wok blong Lokol Gavman?

Ol Provinsol kaonsel oli supevaes laef insaed long komiuniti.

Speseli oli supevaes priskul mo praemerি edukesen, praemerی helt, rijionol planning, ol rod, ol rabis, ol semeteri, ol pak, ol ples we i gat gras mo tu oli lukaotem saed blong ol turist.



Wok blong olgeta hemi impoten tumas long ol man blong komiuniti. Taswe hemi impoten tumas se yu jusum gud kaonsela blong yu. Lokol kansela bae i lukluk long laef blong ol sitisen mo ol man blong provins oli mas ilektem ol man we oli gud, oli hones mo ol man we oli mekem gud wok blong sevem ol komiuniti blong olgeta.

Olsem ol Memba blong Parlemen, ol lokol kaonsela oli stap insaed ia from ol man oli elektem olgeta. Oli mas sowem gudfala wok long ol man. Ol kandidet oli save stanap long saed blong wan politikol pati o oli save stanap olgeta wan nomo. Taem yumi stap kam klosap long ol Eleksen blong Provinsol kaonsel, hemi impoten se wanwan i lanem gud laef blong kandidet, spos oli gudfala man mo spos oli redi blong sevem komiuniti blong olgeta. Yu no fraet blong go mo toktok wetem ok kandidet. Hemi raet mo responsibiliti blong yu. (wok blong yu)

Spos wan kandidet i talem se bae hemi givim mane, kakae o ol dring o wan narafala samting spos yu vot long hem, lukaot! Hemi wan ofens (akensem lo) blong mekem hemia mo hemi wan ofens spos yu akseptem. Yu no mekem!

**Yu no fogetem se wik ia hemi las jans blong yu blong rejista olsem wan man we bae i vot.
Hariap mo no mestem!**

Wik 2:

21 – 28 Maj 2021

**Yu stanap olsem wan kandidet:
Yumi singaotem ol woman mo ol yut!**



Yu mas redi long ol Provinsol kaonsel elekSEN long 12 Mei 2021

Yu stanap olsem wan kandidet!

Hariap! Ol nominesen (putum nem) blong ol kandidet i stat long wik ia, from 22 Maj kasem 9 Epril. Afta bae i let tumas mo spos yu no mekem bae yu mas wet fo ia bakegen bifo yu save stanap long elekSEN.

Long 12 Mei 2021, bae i gat elekSEN long Provinsol Kaonsel long Penama, Malampa, Shefa mo Tafea. Taem ia bae yumi vot long ol memba long saed blong Provinsol Kaonsel we hemi Lokol Gavman. Lokol gavman hemi impoten tumas, samtaem hemi impoten pitim nasonol gavman from hemi klosap long ol man ples mo hemi tajem wanwan laef blong ol man kwik taem.

Wok blong jusum ol kandidet bae i stat long 22 Maj. I minim se eni man we i wantem stanap blong mekem se ol man oli elektem hem blong hemi kam wan memba blong Provinsol Kaonsel blong ripresentem ol man insaed blong komiuniti blong hem, hemi save mekem. Spos yu stanap, yu mas redi blong sevem ol man insaed blong komiuniti blong yu, lukaotem ol raet blong olgeta mo wok bigwan blong mekem se laef blong olgeta i kam gud.

Hemia ol kondisen spos yu wantem stanap olsem wan kandidet.

Olgeta we oli impoten tumas oli:

- Yu mas gat sitisenjip blong Vanuatu
- Yu mas pitim 21 ia
- Yu mas gat nem blong yu i stap finis insaed blong rejistri long ples we bae yu stanap
- Ino mas gat wan samting i talem se yu NO save vot.
- Yu no mas gat wan sentens blong kot mo no mas gat wan suspended sentens (man i karem sentens be i save stap aotsaed long jail) mo no mas stap insaed long jail
- Yu no mas gat bankrapsi (taem bank i talem se yu nomo gat mane).



Tingbaot gud fastaem. Wan man ino save stanap long elekSEN mo no save kam wan memba blong lokol gavman Kaonsel spos hemi wan memba blong Parlemen finis, spos hemi diskwalifae (lusum raet blong hem) long stap olsem wan memba blong Parlemen o spos hemi wok finis insaed blong lokol gavman Kaonsel. Yu no save stanap spos yu wok olsem wan pablik seven (wok insaed blong gavman), olsem wan polis, judj, majistret o tija.

Ol kandidet oli karem nominesen long wanwan man, oli save karem nominesen long wan politikol pati o long wan man nomo (olsem wan independent kandidet). Ol politikol pati oli save nominetem wan man o tu man o pitim namba ia, long wan taem.

Ol woman, yufala i stanap long taem ia!

Long taem ia long ol eleksen blong Provinsol Kaonsel blong Penama, Malampa, Shefa mo Tafea, Elektorol Komisen i wantem talemaot long ol man blong Vanuatu se oli enkarejem bigwan ol woman blong stanap olsem ol kandidet. I gat ol gudfala mo strong woman olbaot mo yumi nidim vois blong olgeta insaed blong ol Provinsol Kaonsel.

Long taem long las provinsol eleksen, i gat wan woman nomo we ol man oli elektem hem long Vanuatu. Dipatmen blong ol Lokol Autoriti oli apointem six moa woman blong representem ol woman long ol kaonsil blong provins from ino gat woman nating. Be hemia i rong. Long ol eleksen, i mas gat ol woman we ol man oli elektem olgeta from oli sowem se oli save mekem gudfala wok. Yumi nidim ol woman blong stanap mo yumi nidim ol man mo ol woman long komiuniti blong sapotem olgeta mo blong vot long olgeta.

Tingbaot ol gudfala woman long komiuniti blong yu mo enkarejem olgeta blong stanap olsem kandidet. Woman blong mifala oli save mekem bigfala wok long kaontri blong mifala from oli save gud wanem man i nidim insaed blong komiuniti. Ol woman oli save wanen ol pikinini oli nidim long fiuja. Spos yu wan woman, tingbaot hemia.

Hemi had be yumi nidim ol woman we oli gat ol smol pikinini finis o ol woman we bae oli gat pikinini blong stanap long ol provinsol Kaonsel. Olgeta oli impoten from oli save helpem blong stanemap ol kindergarden, ol skul mo ol klinik. Ol mama oli save talemaot long ol narawan se hemi impoten tumas blong rejistarem pikinini taem hemi bon mo karem wan ID namba long hem. Hemia bae i helpem pikinini blong karem ol merisin spos hemi nidim mo blong go long skul. Spos hemi gat ID namba bae hemi save karem wan ID kad.

Yut stanap

Ol yang man mo ol yang woman oli mas stanap tu. Ol yut oli gat fulap aedia blong impruvum (mekem se i kam gud) fiuja blong kaontri. Yumi nidim olgeta insaed blong provinsol Kaonsel. Spos yu pitim 21 ia mo yu gat ol kwaliti blong wan lida, tingbaot hemia! Blong stanemap olsem wan lida, yu mas wok had be hemi wan bigfala jalenj tu. Askem ol fren mo famle spos oli ting se yu wan gudfala lida. Yumi nidim speseli ol yang woman insaed blong ol lokol gavman.

Ol handikap man oli nidim blong stanap tu!

Spos yu wan handicap man, ino minim se yu no save stanap olsem wan kandidet. Vois blong yu hemi impoten tumas mo bae yu save toktok long saed blong ol narafala wan we oli handicap. Bae yu save mekem se ol man oli tingbaot gud long ol man wetem handicap insaed blong komiuniti blong yu. Stanap olsem wan kandidet!



Buk mo ol narafala infomesen blong ol kandidet

Websaet blong VEO

VEO hemi gat fulap infomesen long saed blong ol kandidet. Websaet blong VEO hemi electoral.gov.vu

Bae yu faenem ol nominesen fom (pepa) spos yu go long "Pati mo Kandidet", afta yu go long "Wok blong Nominesen mo ol fom"



VEO i mekem wan gudfala buk long ol kandidet finis. Buk ia hemi givim fulap infomesen long saed blong nominesen, wanem yu nidim blong mekem olsem wan kandidet mo ol gudfala tingting. Speseli hemi talemaot ol rul blong kampen (rod blong folem blong mekem se ol man bae oli save yu olsem wan kandidet) mo i givim ol gudfala tingting long saed blong ol woman. Ol kandidet oli sud go karem wan kopi blong Buk blong Kandidet insaed long VEO ofis. Yu save karem wan kopi long Elektorol Ofis long Vila o karem wan kopi long provinsol ofis. Yu save karem hemia tu spos yu go long internet mo daonlodem (karem insaed blong internet) Buk blong Kandidet spos yu go long websaet blong VEO daon long ples ia "Nominesen mo Prosidja (olsem wanem blong mekem)". Hemi fri nomo.

Yu save klik (prestem baton) long link we i stap daon mo daonlodem wantaem.

https://electoral.gov.vu/images/PDFs/VEO_Candidate_Handbook_digital.pdf



Givim raet long wan man blong hemi vot spos yu no no save go vot: Karem pepa naoia!



Yu gat wan handikap mo yu no save muvmuv tumas?

Yu sik?

Yu no stap long ples ia?

Spos bae yu no stap long taem blong eleksen o spos yu sik mo bae yu no save go vot long 12 mei 2021, karem pepa ia (proksi kad) bifo 28 epril blong givim raet long wan man i vot wetem tingting blong yu.


Fasin blong mekem

- Faenem wan man we yu save trastem hem mo man ia i mas gat rejistresen blong hem long sem ples olsem yu.
- Karem pepa ia long wan rejistresen ofisa.
- Yu mas sowem se bae yu no save go long taem blong ol provinsol eleksen long 12 Mei 2021.
- Ol ofisa bae oli jekem from wanem yu no save go. Spos oli akseptem risen blong yu, bae yu givim elektorol kad blong yu o wan kopi blong Nasonol ID long man we yu trastem hem blong hemi vot folet tingting blong yu.
- Long dei blong ol eleksen man ia bae i mas karem pepa ia (proksi kad) mo elektorol kad o wan kopi blong nasonol ID blong yu long ples blong vot. Talem gud long man ia yu wantem vot long huia mo bae hemi mas folet tingting blong yu.
- Yu mas karem proksi kad (pepa blong givim raet long wan narafala man) bifo 28 Epril 2021. Afta deit ia bae i let finis mo bae yu nomo save vot.



Yu no sua long wan samting?

VEO hemi stret ples we i gat raet blong givim infomesen long saed blong ol elekSEN. Spos yu no sua long wan samting, kolem olgeta long 23914. Jekem gud websaet blong Elektorol Ofis we i gat fulap infomesen long saed blong elekSEN. Adres blong websaet hemi www.electoral.gov.vu.



Wik 3:

28 Maj – 4 Epril 2021



Provinsol Eleksen: Ol kandidet yufala i kam naoia mo karem ol pepa!

Hemia wan mesej long Vanuatu Elektorol Ofis (VEO). Long ia we yumi stap long hem naoia, hemi impoten tumas long ol provins blong Penama, Malampa, Shefa mo Tafea. Bae oli elektem ol niufala provinsol Kaonsel. Eleksen hemi wan gudfala taem blong jenjem ol samting. Hemi jans blong mifala blong vot long wan lida we bae i save wok gud blong helpem provins blong hem mo ol man insaed blong provins ia.

Tingbaot wanem yu wantem mekem long komiuniti blong yu mo olsem wanem yu save mekem laef i kam gud. Kaontri blong mifala i nidim ol woman mo ol yut blong kam insaed politik. Politik hemi blong evriwan. Hemi no long jif nomo. Hemi no long ol bigbig man blong mifala nomo. Politik i minin se bae yu save toktok strong long saed blong bilif blong yu mo bae yu save stanap long ol raet blong komiuniti blong yu. Eni kaen man i save wok blong mekem se Vanuatu i kam gud long ol sitisen. Tingbaot gud spos yu save mekem wok olsem wan gudfala lida mo spos yu save wok long saed blong komiuniti blong yu.

Haf blong populesen oli ol woman. Vanuatu i gat fulap woman we oli wok had mo oli save mekem fulap samting. Fulap woman oli mekem gudfala samting long komiuniti blong mifala no mata oli no gat hae edukesen (oli no go long skul tumas). Hemi had long wan woman blong stanap be i gat fulap woman bae oli save mekem gudfala wok insaed blong komiuniti spos oli wok insaed blong ol provinsol kaonsel mo spos oli toktok strong blong mekem se laef i kam gud long ol man.

Ol woman oli gudfala lida from oli tingbaot ol pikinini mo komiuniti fastaem. Yumi gat rispek long fulap woman from oli ones, oli manajem taem blong olgeta long wan gudfala fasin, oli save wok gud mo oli save gudfala samting. Oli tingbaot fiuja from oli tingbaot ol pikinini blong olgeta. Raon long wol naoia ol woman oli stanap mo ol man oli luksave se oli gudfala lida.

Wanem i mekem wan gudfala lida?

Wan gudfala lida hemi wan man we hemi save mekem ol samting ia:

- Harem gud ol man mo lukaotem gud olgeta
- Putum ol nid blong ol man fastaem antap long nid blong hem
- Hemi Ones mo ino stap long korapsen
- Yusum mane blong gavman blong mekem se laef blong komiuniti blong hem i kam gud
- Lukaotem gud komiuniti long saed blong ol rod, ol skul mo ol klinik
- Hemi gat rispek long eni man (ino long sam man nomo)
- Toktok strong blong mekem se laef blong ol pua man i kam gud. Lukaotem gud ol smol vilij, ol man we oli wika mo ol man we oli handikap.
- Lukatoem gud ol nejia (ol tri) mo envaeronmen (solwata, ol hil,...)



Fasin blong stanap olsem wan kandidet

Yu mas go long ofis blong lokol gavman blong yu (ples bae i gat eleksen) mo karem wan fom (wan pepa) blong putum nem blong yu mo saenem pepa ia.



Lukaot gud!

**Yu mas givim bak fom ia long ofis bifo 9 Epril
2021 bifo hal pas fo. (4.30 pm)**

Spo yu let tumas, bae oli no save akseptem fom ia.

Antap long hem, yu mas mekem hemia:

- Pem 20.000 Vt long olgeta. Mane ia bae oli no givim bak long yu.
- Givim 2 foto we i sowem gud fes blong yu.
- Yu mas gat wan elektorol symbol long pepa blong yu. Ol man we oli stap wetem wan politikol pati we EC i apruvum finis simbol blong olgeta, oli no gat nid blong mekem.
- I mas gat signejia blong 5 man we oli rejista finis long provins blong yu mo oli no famle blong yu.

Bae yu save givim pepa (fom blong sowem se yu wan kandidet) long wan (1) lokol gavman nomo, ino tu o tri.

Rejistresen ofisa bae i karem pepa blong yu mo bae i mas givim long bos blong hem kwiktaem nomo mo bae oli mas givim wan risit long yu.



Wanem bae i hapen spos yu wan kandidet

Bae yumas wok had blong stanap olsem wan kandidet. Spos yu stap long wan politikol pati, bae yu nidim sapot long ol narafa man i stap insaed long pati. Spos yu wan independent kandidet, bae yu nidim sapot blong komiuniti blong yu, ol fren blong yu mo famle blong yu. Blong mekem kampen blong yu (wok blong mekem se ol man bae oli vot long yu) hemi had wok mo bae yu nidim fulap mane. Tingbaot gud long ol man bae oli save sapotem yu. Toktok long ol man mo askem olgeta wanem komiuniti i nidim. Toktok gud wetem olgeta long wanem yu wantem mekem. Spos yu save wan woman o wan yut long komiuniti blong yu we hemi gat gudfala fasin, sapotem olgeta blong oli stanap olsem wan kandidet.

Spos yu wan woman, askem ol famle mo ol fren blong yu spos oli wantem sapotem yu mo helpem yu. Bae yu mas lego haos mo go long ples we i gat ofis blong lokol gavman. Huia bae i lukaotem ol pikinini mo haos blong yu? Spos yu tingbaot gud bae yu save mekem be ol famle mo ol fren bae oli mas helpem yu. Ol man bae oli glad long yu.

Ol fom blong kandidet bae oli klos long 9 Epril 2021, so yu mas hariap naoia. Tingbaot gud mo gohed blong mekem se komiuniti blong yu bae i kam gud.

Ol nem blong ol kandidet we i stret bae i kamaot long niuspepa long 20 Epril 2021. Sem taem kampen bae i stat tu. (Kampen: fasin blong mekem se ol man bae oli save yu mo bae oli vot long yu).

VEO i gat websaet blong hem wetem ol infomesen blong kandidet.

Go long: **electoral.gov.vu**

Bae yu faenem ol fom (pepa blong kandidet) spos yu prestem baton "Pati mo Kandidet", after go long "Fasin blong Nominesen mo ol fom" (pepa).

VEO i mekem wan gudfala buk long kandidet. Buk ia i givim fulap infomesen long saed blong nominesen (putum nem blong yu insaed blong fom), wanem yu mas mekem spos yu wan kandidet mo ol nara gudfala infomesen. Speseli hemi talemaot ol fasin blong mekem kampen mo hemi givim fulap gudfala infomesen long saed blong ol woman kandidet. Yu save daonlodem noaia long websaet blong VEO. Yumi enkarejem ol kandidet blong karem wan kopi blong Buk blong Kandidet long VEO (Vanuatu Elektorol Ofis). Yu save go karem pepa blong hem long VEO long Vila or karem wan pepa kopi long ol provinsol ofis. Bae yu save daonlodem Buk blong Kandidet long saed blong VEO. Hemi fri. Yu go long "Nominesen mo Prosidja". Yu save klik (prestem baton) ia:

<https://electoral.gov.vu/images/PDFs/VEO Candidate Handbook digital.pdf>

VEO hemi ofis we i gat raet blong givimaot infomesen long ol samting long saed blong eleksen. Spos yu no sua, yu save kolem olgeta long 23914. Jekem websaet blong Elektorol Ofis. I gat fulap infomesen long ples ia.

Websaet blong hem, hemi: www.electoral.gov.vu.

Wik 4: 04 – 11 Epril 2021



Ol Provinsol Eleksen: Las janis blong yu stanap olsem wan kandidet!

Hemia wan mesej long Vanuatu Elektorol Ofis (VEO). Long ia we yumi stap long hem naoia, hemi impoten tumas long ol provins blong Penama, Malampa, Shefa mo Tafea. Bae oli elektem ol niufala provinsol Kaonsel.

Las janis blong yu stanap olsem wan kandidet!

Man we hemi memba blong Provinsol kaonsel bae hemi mas wok had mo bae hemi gat fulap responsibiliti. Be hemi gud tumas from Provinsol Kaonsel hemi fes impoten ples blong Lokol Gavman mo hemi tajem laef long ol man insaed long komiuniti. Spos yu stanap olsem wan kaonsela, bae yu save helpem ol man insaed blong komiuniti.

Elektorol Komisen blong Vanuatu hemi wantem se ol woman oli stanap mo wok long ol Provinsol kaonsel. Ol woman oli representem haf long populesen blong Vanuatu be from kaljia blong Vanuatu, oli no stap long ol wok blong mekem ol desisen olsem ol lida. Situesen ia i semak olsem ol narafala kantri be naoia situesen ia i stap jenj. Ol woman oli waes mo oli save gud ol samting, no mata oli no gat tumas iksperiens insaed blong politik.

Yumi nidim waes long ol woman ia blong mekem ol gudfala desisen blong fuija blong ol pikinini blong yumi.

Yu save sam woman we oli wantem stanap long eleksen blong provins blong yu? Spos ino gat, hariap, i gat taem yet! Yu save wan woman insaed blong komiuniti blong yu we i stap mekem ol gudfala wok finis? Sapotem hem. Mekem ol fanresin blong sapotem hem. Sapotem hem mo spos hemi winim eleksen, bae yu save se hemi wok blong helpem komiuniti blong yu.

Spos yu, yu man blong hem, spos yu papa o brata blong hem, mo spos yu ting se woman ia bae i save mekem gudfala wok insaed blong Provinsol kaonsel, sapotem hem. Bae yu glad long hem.

Ol nominesen blong ol kandidet bae oli klos long 9 Epril 2021 long fo long aftenun (4 pm)



From wanem ol elekSEN ia oli impoten tumas?

From wanem ol man long Penama, Malampa, Shefa and Tafea bae oli mas vot insaed blong elekSEN ia?

Penama, Malampa, Shefa mo Tafea bae oli go vot blong jusum ol memba blong Provinsol kaonsel. Bae oli wok long fo ia (4). Hemia long taem. Mekem sua se yu jusum gud ol stret kandidet. Hemi impoten se evri man hemi vot long hem. Spos yu no vot, bae yu no save toktok afta spos yu no glad long ol wok we ol memba i mekem insaed blong komiuniti. Hemi wok blong yu blong jusum gud memba ia bifò hemi go insaed long provinsol kaonsel. Spos yu no mekem, bae ino fol blong hem. Yu wan man we i vot mo yu wan man blong komiuniti. Hemi raet blong yu blong mekem sua se ol memba we yu elektem oli mekem gud wok blong olgeta. Be yu mas vot!

From wanem Provinsol Kaonsel hemi impoten tumas?

Long 2017, Gavman blong Vanuatu hemi karem wan fasin blong putum ol man blong gavman klosap long ol komiuniti (ia 2017 kasem 2027). Fasin ia (polisi) hemi blong helpem ol sitisen blong mekem desisen tu mo blong mekem se oli save toktok long saed blong wok blong ol man ia. Hemia stret wok blong ol provinsol Kaonsel. Ol provins bae oli karem moa wok olsem Edukesen blong ol smol pikinini, ol raet blong ol woman mo ol jenj blong klaemet.

Ol man ples oli gat fulap problem. Taswe hemi impoten tumas blong yu vot long provinsol elekSEN. Provinsol Kaonsel hemi gat fulap responsibiliti mo wok insaed blong vilij mo komiuniti. Nem blong ol stret kandidet bae i kamaot long 20 Epril. Go faenemaot wanem laef ol kandidet oli gat. Jusum stret kandidet.



**Nem blong ol stret kandidet bae i
kamaot long 20 Epril.**

**Go faenemaot wanem laef ol kandidet
oli gat. Jusum stret kandidet.**



VEO hemi stret ples blong givim ol infomesen long saed blong eleksen. Spos yu no save gud, **kolem olgeta long 23914**. Jekem websaet blong Elektorol ofis we hemi gat fulap infomesen long saed blong eleksen. Go long: www.electoral.gov.vu.

Wik 5:

11 – 18 Epril 2021



Provinsol Eleksen: Yumi singaotem ol yut!

Hemia wan mesej i kam long Vanuatu Elektorol Ofis (VEO).

2021 hemi wan impoten ia long Penama, Malampa, Shefa mo Tafea. Bae i gat Provinsol Eleksen blong jusum ol memba blong wok insaed blong ol Provinsol Kaonsel.

Long 12 Mei, bae yumi vot blong jusum (elektem) ol niufala memba blong Provinsol Kaonsel. Olgeta bae oli mekem desisen long saed blong fija blong mifala mo ol provins long fo ia (4 ia).

Hemia wan spesol mesej i go long ol yang woman mo ol yang man blong Vanuatu.

Wok blong yu insaed long politik long Vanuatu hemi impoten tumas. Tingbaot wanem bae i hapen mo wanem ol lokol gavman ofis bae oli disaed, bae i tajem laef blong yu. Yu no ting se from yu yang tumas, yu no save mekem wan samting. Ino tru. Yu save wok. Yu save finis wanem bae i gud long fija blong yu, famle, vilij mo komiuniti blong yu. Yu mas tingbaot gud mo yu mas save wanem desisen ol memba insaed blong Kaonsel oli tekem – o oli no tekem!

Yu wan memba blong wan politikol pati finis? Yu save gud ol politikol pati insaed blong eria blong yu? Go faenemaot infomesen long saed blong olgeta, faenemaot ol bilif blong pati, wanem projek mo polisi (stamba blong ol desisen) blong olgeta. Yu no fraet blong askem ol kwesten.

Spos yu no glad long politikol pati, faenem wan narawan we i gat sem tingting olsem yu. Long fulap kantri, ol politikol pati oli gat wan grup blong yut. Hemia i stap hapen sloslo long Vanuatu. Oli stanemap ol grup blong yut mo oli tokbaot wanen i save helpem kaontri blong olgeta. I mas gat semtaem ol yang kel mo ol yang boe, from tufala i gat fiuja insaed blong kantri.

Harem wanen ol independen kandidet oli wantem talem mo wanem ol wok oli wantem mekem. Maet wan independent kandidet bae i gat ol sem tingting olsem yu, sem drim olsem yu.

Go toktok long olgeta, askem kwestien, talemaot ol tingting blong yu. Ol yang man (hemia i talem ol yang woman tu) oli save stanap strong blong tingting blong ol politikol pati mo ol independent kandidet. Yu no fogetem. Vot blong yu hemi impoten, semak olsem vot blong wan man i moa olfala pitim yu.

Tingbaot gud: yu mas toktok wetem rispek be yu no fraet blong toktok! Talemaot ol tingting blong yu long ol kandidet. Hemia i stret nomo. Ino minim se yu no gat rispek long olgeta. Hemi raet blong yu mo bae yu save givim ol tingting blong yu long ol kandidet. Spos yu no agri wetem hem, i oraet nomo. Be yu no mas toktok akensem olgeta o wok blong olgeta. Yu mas givim ol gudfala tingting long fasin we yu ting bae i helpem gud ol man. Askem long olgeta spos oli agri blong mekem wok ia.



Spos yu no glad long wok blong ol kaonsela insaed long provins blong yu, yu save vot long wan narafala man we yu ting se bae hemi save mekem gudfala wok. Spos yu no trastem kaonsela blong yu mo spos yu ting se hemi korap, yu jusum wan narafala man i save mekem gudfala wok. Ol kandidet bae oli statem kampen blong olgeta long 2 dei. Harem wanem oli stap talem mo wanem oli stap promis. Mekem sua se bae oli save mekem wanem oli stap promis.



Mo yu no fogetem se vot blong yu, hemi wan sikret.

Yu no mas talem long ol man bae yu vot long huia, spos you no wantem talem.

Kampen bae i go kasem 9 Mei. Faenemaot wea ples stret mo long wataem bae oli mekem ok toktok blong olgeta. Long taem ia bae oli go raon long komiuniti mo bae oli go talem long ol man wanem stret wok bae oli mekem. Yu mas harem ol kandidet bifo yu jusum stret man. Yu no fraet blong askem kwestien.

Ol yang man mo yang woman oli impoten tumas blong stanemap fiuja blong komiuniti mo vilij. Electorol Komisen i wantem enkarejem ol yang man mo waman blong toktok long saed blong fiuja blong kaontri. Hemi fiuja blong yu.

Ol eleksen oli stap kam naoia. Sam man oli neva vot. Hemia wan bigfala janis long yu. Vot hemi bigfala samting yu save mekem blong helpem komiuniti blong yu. Spos yu no vot, hemi olsem we yu no toktok be yu gat wan samting blong talemaot. No fogetem, hemi raet blong evriman blong vot.

Yu mas toktok wetem vot blong yu. Yu vot long 12 Mei 2021!



Yu no sua long wan samting?

VEO hemi stret ples we i gat raet blong givim infomesen long saed blong ol elekSEN. Spos yu no sua long wan samting, kolem olgeta long 23914. Jekem gud websaet blong Elektorol Ofis we i gat fulap infomesen long saed blong elekSEN. Adres blong websaet hemi www.electoral.gov.vu.



Wik 6:

18 – 25 Epril



Provinsol Eleksen: Ol Elektorol Ofens.

Hemia wan mesej i kam long Vanuatu Elektorol Ofis (VEO).

2021 hemi wan impoten ia long Penama, Malampa, Shefa mo Tafea. Bae i gat Provinsol Eleksen blong jusum ol memba blong wok insaed blong ol Provinsol kaonsel.

I gat fulap lo, rul mo regulesen long saed blong eleksen. Oli impoten from mifala i wantem se ol eleksen oli fri, oli no kiaman long ol man mo i gat pis. Mifala i wantem trastem ol man tu. Hemi responsibiliti long wanwan man blong obei lo mo no mekem wan samting we I brekem loa. Spos yumi mekem wan samting ino gud, hemi wan ofens mo bae yumi save faen long hem o go long kalabus.



Wanem ol Elektorol Ofens?

- Spos yumi vot pitim wan taem.
- Spos yumi vot long wan ples we ino ples blong vot blong yumi.
- Spos yumi tekem nem blong wan narafala man be ino tru mo spos yumi vot wetem nem blong hem.
- Braeberi: tekem mane long wan kandidet mo yumi promis long hem se bae yumi vot long hem.
- Triting: yumi akseptem ol gift, kakae o dring o narafala samting long wan kandidet mo yumi promis long vot long hem.
- Yumi talem ol samting ino tru long saed blong kandidet.
- Yumi stopem wan elektorol ofisa blong mekem wok blong hem.
- Yumi sakem o stilim ol pepa blong vot.
- Yumi sakem o stilim ol elektorol kad.
- Yumi mekem wan samting blong spolem wan man taem hemi vot mo ino mo gat sikret long vot blong hem.
- Yumi givim ol kiaman infomesen long ol elektorol ofisa.
- Yumi mekem wan samting blong stopem box we i gat ol vot insaed o narafala pepa.

I gat mo ofens long saed blong ol kandidet we i talemaot wanem oli save mekem o wanem oli no save mekem. Kampen bae i stat long 20 Epril. Long 2 wik, ol kandidet bae oli gat raet blong gat miting blong talemaot long ol man wok blong olgeta spos oli elektem olgeta. Oli save mekem ol posta mo ol pepa blong infomesen blong traem blong kasem tingting blong ol man blong oli vot long olgeta. Spos wan kandidet i givim mane o wan narafala samting long yu blong fosem yu blong vot long hem, o spos hemi mekem se yufala i fraet o toktok nogud long yufala, hemi wan ofens.

Hemi responsibiliti long evriman blong lukaotem gud eleksen mo blong mekem sua se ino gat man i mekem wan ofens. Spos you luk o yu save wan kandidet i mekem hemia, bifo eleksen o long stret dei blong eleksen, yu mas go talem long polis.

Yu wan handikap man mo yu no save muvmuv?

Yu no stap long stret ples blong yu o yu sik mo yu no save go vot long 12 Mei ?

Yu mas aplae bifo 28 Epril blong karem wan proksi kad blong givim long man bae i vot folem tingting blong yu.



Fasin blong mekem

- Faenem wan man we yu save trastem hem mo man ia i mas gat rejistresen blong hem long sem ples olsem yu.
- Karem pepa ia long wan rejistresen ofisa.
- Yu mas sowem se bae yu no save go long taem blong ol provinsol eleksen long 12 Mei 2021.
- Ol ofisa bae oli jekem from wanem yu no save go. Spos oli akseptem risen blong yu, bae yu givim elektorol kad blong yu o wan kopi blong Nasonol ID long man we yu trastem hem blong hemi vot folem tingting blong yu.
- Long dei blong ol eleksen man ia bae i mas karem pepa ia (proksi kad) mo elektorol kad o wan kopi blong nasonol ID blong yu long ples blong vot. Talem gud long man ia yu wantem vot long huia mo bae hemi mas folem tingting blong yu.
- Yu mas karem proksi kad (pepa blong givim raet long wan narafala man) bifo 28 Epril 2021. Afta deit ia bae i let finis mo bae yu nomo save vot.



Lukaot! I gat 3 dei nomo i stap!

28 Epril hemi LAS DEI blong aplae long wan narafala kopi blong elektorol kad blong yu spos yu lusum finis mo spos you no gat wan nasonol ID kad.

Mekem sua se you gat kad blong yu spos no bae yu no save vot long 12 Mei!

VEO hemi stret ples we i gat raet blong givim infomesen long saed blong elekSEN. Spos yu no sua long wan samting, yu **kolem olgeta long 23914**. Jekem websaet blong Elektorol Ofis we i gat fulap infomesen long saed blong elekSEN long www.electoral.gov.vu.

Wik 7:

25 Epril – 02 Mei



Provinsol Eleksen: Ol kandidet bae oli kampen kasem 9 Mei 2021

Hemia wan mesej i kam long Vanuatu Elektorol Ofis (VEO).

2021 hemi wan impoten ia long Penama, Malampa, Shefa mo Tafea. Bae ino longtaem bae i gat Provinsol Eleksen blong jusum ol memba blong wok insaed blong ol Provinsol Kaonsel. Ol memba ia bae oli wok blong helpem laef blong ol komiunity blong mifala long fo ia (4 ia).

Yu lusum elektorol kad blong yu?

Evriwan i mas redi. Tingbaot, bae yu no save vot spos yu no gat wan elektorol kad o wan ID. Yu gat wan finis? Spos yu lusum o yu spolem kad blong yu, hariap, yu mas karem wan bifo 28 Epril. Pasem deit ia bae i tu let.

Spos yu wantem askem wan narafala elektorol kad, yu go long elektorol ofis mo askem long olgeta. Bae yu mas pem 200 Vt long wan.

Yu wan handikap man mo yu no save muvmuv?

Yu no stap long stret ples blong yu o yu sik mo yu no save go vot long 12 Mei ?

Yu mas aplae bifo 28 Epril blong karem wan proksi kad blong givim long man bae i vot folem tingting blong yu.



Fasin blong mekem

- Faenem wan man we yu save trastem hem mo man ia i mas gat rejistresen blong hem long sem ples olsem yu.
- Karem pepa ia long wan rejistresen ofisa.
- Yu mas sowem se bae yu no save go long taem blong ol provinsol eleksen long 12 Mei 2021.
- Ol ofisa bae oli jekem from wanem yu no save go. Spos oli akseptem risen blong yu, bae yu givim elektorol kad blong yu o wan kopi blong Nasonol ID long man we yu trastem hem blong hemi vot folem tingting blong yu.
- Long dei blong ol eleksen man ia bae i mas karem pepa ia (proksi kad) mo elektorol kad o wan kopi blong nasonol ID blong yu long ples blong vot. Talem gud long man ia yu wantem vot long huia mo bae hemi mas folem tingting blong yu.

Klosap Politikol Kampen bae i finis

Stat long 20 Epril, ol kendidet oli wantem stap insaed blong Provinsol kaonsel oli bin mekem kampen blong olgeta. Sam blong olgeta oli mekem ol kampen blong talemaot long ol man wanem wok oli wantem mekem blong helpem komuniti. Lisen gud long olgeta mo askem kwestien. Spos yu no hapi wetem ol memba blong kaonsel we i stap finis, jekem wanen ol niufala kandidet oli stap promis. Oli stap talem wanem long saed blong helpem komiuniti? Harem olgeta fastaem bifo yu jusum long 12 Mei taem yu vot.

Wanem i impoten long yu? Yu trastem kandidet ia? Yu ting se toktok blong hem i tru? Tingbaot se kandidet bae i winim eleksen bae hemi stap insaed long provinsol kaonsel long fo ia. Jusum gud fastaem bifo yu vot.

Spos wan kandidet i wantem givim mane or narafala saming olsem kakae, dring, materiol o narafala samting blong yu vot long hem, hemi rong. Hem i wan ofens mo yu mo kandidet bae yutufala save fesem panismen. Hem i rong spos kandidet ia i tretenem (talem toktok blong mekem se yu fraet) yu o ol man long komiuniti. Spos oli mekem, yu mas ripot long polis.

Jusum gud Kandidet blong yu

Taem yu jusum kandidet we bae you vot long hem, tingbaot wanem i mekem wan gudfala lida. Yumi wantem se oli ones, se oli wok had, yumi save trustem olgeta, oli no korapt. Oli mas putum ol nid blong ol man fastaem blong mekem se laef i kam gud long komiuniti. Oli sud lukaotem gud saed blong woman, ol maenoriti (ol vilij we ino gat fulap man) mo ol man we oli handicap. Oli sud lukaotem gud edukesen, helt mo wok blong ol yut. Mo hemi sud lukaotem gud envaeronmen long ol aelen.

Harem wanem ol kandidet oli stap talem. Yu no fraet blong askem kwestien. Ino minim se yu no gat rispek. Hemi raet blong yu blong save wanem wok provinsol kaonsel bae i mekem insaed blong

komiuniti blong yu. I gat sam kandidet oli gat moa mane pitim sam narafala wan mo oli save mekem ol bigfala miting mo mekem ol posta mo ol foto. Be yu mas harem ol narawan tu blong harem wanem oli stap talem.

Tingbaot. Vot hemi sikret. Yu save vot long eni kandidet we yu ting i stret nomo. Ino gat nid blong talem long ol man bae yu vot long hu ia.

VEO hemi stret ples we i gat raet blong givim infomesen long saed blong eleksen. Spos yu no sua long wan samting, yu kolem olgeta long **23914**. Jekem websaet blong Elektorol Ofis we i gat fulap infomesen long saed blong eleksen long www.electoral.gov.vu.



Wik 8: 2 – 10 Mei



Provinsol Eleksen: I gat fiu dei nomo bifo Eleksen long 12 Mei

Hemia wan mesej i kam long Vanuatu Elektorol Ofis (VEO).

Neks Wenesdei 12 Mei 2021, ol sitisen blong Penama, Malampa, Shefa mo Tafea bae oli vot long niu Provinsol Kaonsel. Hemi taem blong harem wanem oli stap talem. Yu save gud ol kandidet long eria blong yu? Tekem taem long go harem olgeta. Hemi jans blong yu blong jusum man we bae i ripresentem yu mo komiuniti blong yu long 4 ia. Jusum gud! Yu no lesen long wanem ol narafala man oli mekem wetem vot blong olgeta. Spos yu no wantem folem wanem oli mekem, hemi raet blong yu. Jusum gud mo vot long man we yu ting bae hemi mekem gudfala wok long komiuniti blong yu.

Vot blong yu hemi sikret

Bae ino gat man i save yu vot long huia mo ino gat nid blong talem long wan man se yu vot long hu ia. Vot blong yu hemi sikret. Spos wan man i toktok strong long yu blong mekem se yu fraet o wan man i wantem fosem yu blong yu vot long narafala man, go ripotem hem long polis mo long jif blong yu!



Tingbaot hemi rong blong akseptem mane or narafala samting long wan kandidet o ol man blong hem blong fosem yu long vot long hem. Hemi wan ofens mo yu save faen o panis long hem.

Jekem ples blong vot long ples blong yu!

Mekem sua se you save ples blong vot i stap wea. Hemi impoten tumas from yu no save vot long narafala ples be ples ia nomo we oli talem se bae yu mas vot long hem.

Spos yu no sua, kolem elektorol ofis long 23914.



Yu redi long neks Wenesdei!

Mekem sua se yu gat elektorol kad blong yu o ID blong yu mo mekem sua se yu save gud ples blong vot i stap. Bae i open long 7.30 long moning mo bae hemi klos long 4.30 long afternun. Mekem sua se yu go eli mo wet long kiu (laen). Bae yu mas wet blong yu pass. Spos yu luk wan woman i olfala, wan woman i gat bel o wan handikap man, yu letem olgeta oli pass fastaem. Taem hemi taem blong yu, yu save go insaed.

Fasin blong vot:

1. Sowem elektorol kad o ID blong yu long Vot Ofisa.
2. Vot Ofisa bae i jekem spos kad blong yu i stret mo spos ino gat ink long finga blong yu.
3. Vot Ofisa bae i jekem spos nem blong yu i stap long elektorol rol.
4. Taem hemi faenem nem blong yu mo jekem ID blong yu, bae hemi stretem long pepa – mekem sua se nem blong yu i stret from elektorol kad o ID blong yu hem evidens blong yu gat raet long vot long ol narafala eleksen long fiuja.
5. Vot Ofisa bae i givim wan envelop wetem wan smol buk. Insaed i gat ol pepa wetem nem blong ol kandidet.
6. Go insaed long vot kona. Ol handikap oli save askem wan man blong helpem olgeta spos oli no save go insaed long vot kona. Man ia hemi mas rejista finis.
7. Openem buk wetem ol nem blong kandidet mo faenem pepa blong kandidet yu wantem vot long hem. Spos yu luk foto blong olgeta bae yu faenem kwiktaem nomo.
8. Putum pepa blong kandidet we yu jusum insaed blong envelop mo kamaot long vot kona.
9. Sowem long Vot Ofisa envelop blong yu. Sakem ol narafala envelop insaed long bin aotsaed o long ples we Vot Ofisa i talem long yu.
10. Putum envelop blong yu insaed long vot box (Balot box).
11. Vot Ofisa bae i stampem elektorol kad blong yu wetem stamp blong gavman, long ples we i talem “deit blong vot”. Oli putum deit mo oli saenem tu.
12. Givim Vot Ofisa left finga (tam) blong yu mo putum insaed ink.
13. Karem bak elektorol kad blong yu.
14. Lego ples blong vot.



I gat fiu dei nomo i stap blong mekem tingting blong yu long saed blong man we bae yu vot long hem long Wenesdei. Tingbaot gud, jusum gud.

Vot hemi raet blong yu mo responsibiliti blong yu. Hemi jans blong yu blong givimaot tingting blong yu.

Tingbaot. Long wan demokraci, bae i gat wan man nomo bae in win, ino evriman. Spos kandidet yu vot long hem i no kasem fulap vot, bae hemi no save go insaed long provinsol Kaonsel. Yu no kros. Ating bae hemi win neks taem.

Yumi evriwan i mas akseptem risal blong eleksen.

Vot blong yu hemi fija blong yu mo fija blong Vanuatu.

Mekem sua se yu vot long 12 Mei!

**Mekem sua se Eleksen hemi pisful
(Mekem se ino gat man i mekem trabol)**

Yumi glad long demokraci blong Vanuatu!



Stret dei blong Eleksen: 12th Mei

Vot blong yu.
Fiutja blong yu.
Vanuatu blong yu.



Elektorol Komisen bae i givimaot risal ino long taem. Spos kandidet you vot long hem ino kasem fulap vot bae hemi no save go insaed long provinsol Kaonsel.

Ino gat ol man i save win, sam man nomo! Yu no kros. Mifala evriwan i mas akseptem risal blong eleksen. Bae i gat neks taem bakegen blong win.

Mekem sua se Eleksen hemi pisful
(Mekem se ino gat man i mekem trabol)

Yumi glad long demokraci blong Vanuatu!

Vot blong yu hemi sikret!

Yu no talem long wan man long saed blong vot blong yu, spos yu no wantem talem. Yu save vot long eni man. Yu no letem wan man i toktok strong blong fosem yu blong vot

Tedei hemi stret dei blong Eleksen! Hariap, yu go long ples blong vot mo yu vot!

**Yu no fogetem Elektorol Kad blong yu
o ID blong yu mo hariap, yu go long
ples blong vot blong yu.**



Fasin blong vot (yumi talem bakegen) Go long ples blong vot blong yu mo wet long kiu (laen).

1. Sowem elektorol kad o ID blong yu long Vot Ofisa.
2. Vot Ofisa bae i jekem spos kad blong yu i stret mo spos ino gat ink long finga blong yu.
3. Vot Ofisa bae i jekem spos nem blong yu i stap long elektorol rol.
4. Taem hemi faenem nem blong yu mo jekem ID blong yu, bae hemi stretem long pepa – mekem sua se nem blong yu i stret from elektorol kad o ID blong yu hem evidens blong yu gat raet long vot long ol narafala eleksen long fiuja.
5. Vot Ofisa bae i givim wan envelop wetem wan smol buk. Insaed i gat ol pepa wetem nem blong ol kandidet.
6. Go insaed long vot kona. Ol handikap oli save askem wan man blong helpem olgeta spos oli no save go insaed long vot kona. Man ia hemi mas rejista finis.
7. Openem buk wetem ol nem blong kandidet mo faenem pepa blong kandidet yu wantem vot long hem. Spos yu luk foto blong olgeta bae yu faenem kwiktaem nomo.
8. Putum pepa blong kandidet we yu jusum insaed blong envelop mo kamaot long vot kona.
9. Sowem long Vot Ofisa envelop blong yu. Sakem ol narafala envelop insaed long bin aotsaed o long ples we Vot Ofisa i talem long yu.
10. Putum envelop blong yu insaed long vot box (Balot box).
11. Vot Ofisa bae i stampem elektorol kad blong yu wetem stamp blong gavman, long ples we i talem “deit blong vot”. Oli putum deit mo oli saenem tu.
12. Givim Vot Ofisa left finga (tam) blong yu mo putum insaed long ink.
13. Karem bak elektorol kad blong yu.
14. Lego ples blong vot.

long narafala man. Talem long olgeta se vot hemi sikret mo hemia lo. Tingbaot, spos you akseptem ol samting olsem kakae, mane or narafala samting blong fosem yu blong vot long wan man, hemi wan ofens. Yu save faen long hem o go long prisem. Yu no mekem!



*Empowered lives.
Resilient nations.*

